



Pledpierla - In 10 ans

„1, 2, 3, 4...“, od eau a las mattas da visavi chi saglian culla corda da saglir. Eau sun sün mieu let e leg aint il cudesch ch'èau d'he imprasto hoz da la biblioteca. La fnestra da mia stauza es avierta, eau d'he fadia da'm concentrer sün quist cudesch nouv. Quaunt gugent gess eau uossa vi tar las mattas a dumander sch'èau possa giuver cun ellas. Perque ch'èau d'he gieu üna granda dispütta cun mia mamma, nu poss eau fer giò quist marcaldi zievamezdi. Que am pera magari tuct! Ma cunter la voluted da mia mamma nu's riva da fer ünguotta. „Silia, vè giò'n chadafö, tü stust svelt cuorrer per me vi'l Volg!“ Cun pocha vögliau vegn eau svelt giò in chadafö. Lo am schmacha mia mamma in maun üna chavagna e raps. „Tü stust cumprer duos liters lat, ün töch chaschöl, il pü gugent Tilsiter e painch. Ma fo svelt, perche cha hoz serra il Volg già a las quatter. Tü hest temp be aucha ün quart d'ura.“ Eau am tir svelt aint las s-charpas, disch chau, vegn our da porta e cumainz a cuorrer. Eau nu riv dalöntschi fin cha las curagias da mias s-charpas s'évran darcho. Eau m'inchambüerl sur mieus egens peis. Per furtüna sun eau güst auncha buna da guarder ch'èau nu crouda sül catram da nossa via, dimpersè am plach illa strivla d'erva dasper la via. Eau stun sü e bad cha our da mieu schnuogl culla saung. Eau nu se però perche - l'erva vess bain dad esser lamma. Eau stögl esser crudeda sün qualchosa dür. Dimena cumainz eau a tschercher aint ill'erva, lo inua ch'èau sun crudeda. Eau nu vez ünguotta, niauncha ün crappin. Ma spetta, schi, cò es qualchosa chi glüscha cotschen. Eau am sgob per guarder che cha que es e stögl stumpler davent ün pô l'erva per ch'èau vezza che cha que es. Que es ün apparatin chi glüscha in ün bel cotschen. Eau al vuless piglier sü, ma cur cha mieus mauns al tuochan, cumainza'l a glüschi da que mellan singular ed aunz ch'èau inclegia la situaziun, vain ün vent terribel ferm chi'm bütta directamaing darcho giò per terra. Cur cha'l vent es darcho davent, am volv eau be plaunin. perche cha tuot am fo mel e vez ch'èau sun tuot da merda. Eau d'he flachas d'erva e terra süllas chotschas e saung. Mamma vain sgür gritta sch'ella am vezza uschè asera e las cumpras i'l Volg poss eau uossa eir güst schmancher. Quel es nempè sgür eir già serro.

Che es vairamaing capito cun me? Eau stun sü plaunet e guard intuorn. La cuntredgia guarda our simila scu quella ch'èau cugnuosch, la via maistra e las chesas guardan our ün pô scu nossas. Sün quista via ho que però bger dapüs

autos, ils pros a l'orizont sun eir bod listess, be am peran els d'esser bgerun pü pitschens. Ed eir las chesas sun differentas. Ellas sun bger pü modernas, grandas ed insomma, que am pera cha que hegia bger dapüssas. Eau am volv e vez üna chesa chi guarda our simila scu la nossa. Uossa am volv eau e guard auncha ün mumaint intuorn. Cò vez eau a gnir incunter ad üna duonna cun üna charrozzina d'iffaunts. Eau vegn incunter. „Bun di. La poss eau dumander qualchosa? Inua sun eau cò?“ La duonna am examinescha da pè a cho. Ella stüdgia üna pezza che ch'ella desss respunder. Que bad eau be precis. Alura am respuond'la, ch'eau saja cò a S-chanf ed am dumanda, scha saja tuot in uorden cun me.

„A S-chanf??? Que nu po esser! Que es absolutamaing impossibel! A tuots cas briich...!“ Eau sbgreg bod da l'anguscha. Uossa bad eau cha la duonna guarda darcho sün me ed eau guard tuot schockeda sün ella – üna duonna attractiva e simpatica. Ella ho ögls blovs, precis scu eau e chavels blonds scu ils mieus. Que saregia il motiv ch'ella m'observa uschè precis. Eau sun auncha adüna tuot confusa, ma listess la dumand eau cu ch'ella hegia nom. „Eau sun Silia e tü?“ Che situaziun divertenta, quista duonna ed eau vains il listess nom. „Eau d'he eir nom Silia.“

Silia am guarda tuot schockeda. „Es tuot inuorden cun Ella?“, la dumandi. Ella do be dal cho e'm do segn cul maun ch'eau dessa gnir cun ella. Eau la chamin zieva. Üngüna nu disch pled.

Perche ho quista duonna reagieu da möd uschè schoco, cur ch'ella ho udieu ch'eir eau d'he nom Silia? Diversas duonnas haun nom Silia.

In quist mumaint am vegnan adimmaint la chavagna culs raps e l' apparatin. Ohà, mia chavagna! „Be ün mumaint“, clami currind svelto inavous! Per furtüna - la chavagna es auncha adüna lo. Eau pigl svelto sü mia chavagna e vez cha l'apparatin es aint illa chavagna. Pücu facil saro'l svulo cul vent illa chavagna. Uossa fatchsi però chammas e cuor a tuot pudair darcho inavous tar la duonna. Ella am spetta. Eau cuor vi tar ella. „Quant veglia est tü, matta?“ Eau respuond tuot our d'fled, ch'eau saja 15 ans veglia. Silia dvainta sblechischma. „Es que pussibel...?“, repeta ella adüna darcho. Ella chamina inavaunt cun sia charrozzina e squassa il cho. Eau nu riv bod pü zieva ad ella, perche ch'ella chamina adüna pü svelto. Davaunt la chesa chi guarda our simila scu mia, sto ella salda. Uossa piglia Silia our da sia tas-cha üna clef ed evra la porta. Cuaint guarda que our bod listess scu tar me a chesa. Silia ed eau giains in chadafö.

Ella am dumanda, sch'eu vögla baiver qualchosa. Eau sgualat il cho e vegn vi tar la charrozzina.

Silia l'ho pigliada cun se in chadafö. Our da la charrozza am guarda incunter ün poppin pitschen. La duonna piglia l'iffaunt sün bratsch e vo illa stüva. Eau la vegn zieva. Ella as tschainta sülla pultruna e tschegna da gnir a tschanter dasper ella.

Dandettamaing sto Silia però darcho sü e vo vi tar üna cumoda. Lo piglia ella our ün album da fotografias. Ella as tschainta darcho sper me ed evra l'album. „Tü am perast uschè cuntschainta. Eau craj ch'eu d'he guardo our bod listess scu tü cur ch'eu d'eira 15 ans veglia!“ Uossa evra ella l'album e già sülla prüma pagina am vain que consciaint! A nu do üngüns dubis - que sun eau!

Nussas duos clappains bod ün cuolp da cour. „Q...q...que nu po esser!“, disch ella. „Cu est gnida no cò?“ Eau oz las spedlas. Ma cò am vain adimmaint l'apparatin illa chavagna. Eau stun sü e vegn a piglier la chavagna. „Eau craj cha que ho da chefer cun quista maschinia.“ Eau al pigli our e vez pür uossa eau cha'd es sü ün numer. An 2025. Sun eau riveda i'l an 2025? Eau dun l'apparatin a Silia.

In ün möd u l'oter sun eau sgür riveda no cò cun quist apparatin. Que voul eir dir cha quista Silia es 25 ans veglia! „Tü est eau ed eau sun tü. Be cha tü est 10 ans pü veglia!“ Silia fo ögliuns. „Forsa, scha tü tuochast quist apparatin, rivast darcho in tieu temp.“, disch ella.

Eau dun dal cho e nussas piglians cumgio ed ans dains üna brancleda. Prubabelmaing nu'ns vzarinsa nussas pü. Silia m'accumpagna davaunt porta, eau guard intuorn auncha ün'ultima vouta, tegn ferm la chavagna e tuoch cul maun l'apparatin chi cumainza darcho a glüschir da que mellan. Darcho badi ün vent terribel e pamfati croud eau per terra.

„Uau, eau sun darcho a chesa.“

L'apparatin es davent.

Il prüm suni ün pô trista, ma alura guard eau süll'ura e vez cha sun passos be tschinch minuts. Eau stun eau sü e cumainz a cuorrer cun mia chavagna vi vers il Volg.

Alina Locher